

SMK BATU LINTANG PEMADU NYULUT BA PERESA STPM 2015 RENGAT KUCHING

March 3, 2016, Thursday

Borneo Post Online

Dikarang Rengyan Labang, Nick Fletcher



NYULUT: (ari kiba) Alson enggau Aiman begulai enggau dua iku agi nemiak ti nyulut lebu ngambi pemutus peresa ba sekula nya kemari.

KUCHING: Sekolah Menengah Kebangsaan (SMK) Batu Lintang antara sekula ti pepadu nyulut di negeri tu berindik ari pemayuh nemiak sekula nya teulihka penyulut dalam pemutus peresa Sijil Tinggi Persekolahan Malaysia (STPM) 2015 ti dibantaika kemari.

Sekula nya ti kelima pepadu nyulut di serata Sarawak udah teulihka Purata Nilai Gred Keseluruhan (PNGK) 2.97.

Nitihku Penulung Kanan Tingkatan 6 SMK Batu Lintang Teng Swee hock, bisi enam chalun sekula nya teulihka semua A lalu 13 iku chalun teulihka 3A 1B.

“Pemutus naka ke diatu iya nya 50 iku chalun aja laban 75 iku chalun agi deka nandu ngambi peresa nya baru lalu kami ngarapka pemutus peresa chalun ke nandu tu deka nambahka mayuh agi nemiak ke nyulut dalam peresa tu.

“Aku meri terima kasih ngagai apai indai ke lebih agi ngagai PIBG laban ti mayuh meri sukung sereta ngiring nyengkaum bala pengajar ti meri komitmen penuh ngajar bala nemiak,” ku iya lebu dikerandau kemari.

Nya alai ku iya, sekula nya deka terus bebendar ngetan sereta nambahka penyulut ngambika ulih terus nyadi antara sekula ti pepadu nyulut di negeri tu.

Seiku ari nemiak ti nyulut , Alson Lai Zhi Jie bulih 4A madahka diri deka nampung pelajar ngagai National University of Singapore dikena ngemantupka juluk ati iya deka nyadi injinir.

“Aku deka sama enggau mai pemansang ngagai menua sereta dunya nengah bidang injiniring lalu tu senipak enggau gaya menua ti majak mansang,” ku iya.

Nambahka nya, Aiman Zulaikha Mohd Fadzli ti bulih 3A 1B madahka, chara ngatur maya belajar ti betul udah mantu iya teulihka penyulut nya.

“STPM iya nya pilih ti ke penudi aku tang semua iya bepengujung enggau manah.

“Aku ngarapka diri terus mujur dalam pelajar pengudah tu ila,” ku iya ti ngarapka diri ulih nampung pelajar ngagai Universiti Malaya.

Kelimpah ari nya, Teng madahka Rossie Binyai ti nyadi seiku aja chalun Khas STPM di SMK Batu Lintang mega teulihka pemutus ti ngemegah ati lebuah teulihka 1B+ enggau 3B-.

“Rossie seiku nemiak buta tang mujur teulihka penyulut baka tu...kami amat temegah ati ke pemujur iya,” ku iya seraya madahka Rossie diatu di Kuala Lumpur.

Ku Teng madah baru, seiku nemiak SMK Batu Lintang iya nya May wee Win mega udah dipilih nyadi antara penerima gelar nemiak pepadu nyulut Malaysia University English Test (MUET) sesi November ti diatur di Kuala Lumpur.

Berebak enggau nya, ba peresa STPM ke sekali tu SMK St Joseph udah teulihka 68.29 peratus nemiak ti pas ba semua mata pelajar (4P) ba pemutus peresa Sijil Tinggi Persekolahan Malaysia (STPM) 2015 ti dikeluarka sereta di serata menua kemari (2 Mac).

Nitihku Penulung Kanan Form 6 Cikgu Belinda Lim madah, bisi 62 iku chalun nemiak sekula nya ngambi STPM 2015.

Taja pia, pemutus STPM 2015 ke dikeluarka sehari tu (kemari) ukai semua pemutus laban bisi nemiak ke nandu ba sekeda mata pelajar, lalu dipelabaka semua pemutus nya deka dipansutka ba bulan Julai, ku iya.

“Bepelasarka pemutus STPM 2015 Penggal Tiga SMK St Joseph kami bisi 62 iku chalun lalu ari penyampau nya bisi 12 iku nemiak pepadu nyulut nyengkaum 3 iku ari ‘Aliran Sains’ enggau 9 iku ari ‘Aliran Sastera’.

“Lalu penyampau nemiak kami ke ngambi ‘Ulangan (U3)’ iya nya 3:41. ‘Ulangan’ tu meri awak ngagai nemiak ngemanahka agi pemutus peresa sida iya.

“Peratus nemiak kami ti pas ba semua mata pelajar (4P) iya nya 68.29 peratus lalu pas abis nadai seiti mata pelajar (1P) bisi 97.56 peratus,” ku Belinda lebuah dikerandau Utusan Borneo, kemari.

Kemari (2 Mac) pemutus peresa STPM 2015 udah dipansutka di serata menua ke alai pemutus peresa ungkup chalun sekula dianjung ngagai Prinsipal sekula lalu Majlis Peperiksaan Malaysia deka nganjung pemutus peresa ngagai chalun ngatika diri ngena pos.



Berebak enggau seiku nembiaik Aliran Sains SMK St Joseph ti bulih PNGK 3.33, Oliver Yii Chii Sin lebuah dikerandau madahka iya enda nyangka diri pas ba semua mata pelajar.

“Aku amat gaga ati teulihka pemutus peresa aku tu, lalu aku tekenyit sereta enda nyangka diri bisi bulih A. Lalu tu engka asil ari pemendar aku empu nya kebuah teulihka pemutus tu.

“Juluk ati aku deka nampung pelajar ngagai renggat universiti menua tu empu dalam bidang injirniring,” ku iya lebuah dikerandau raban pengarang berita maya ti ngambi pemutus peresa STPM kemari ke alai iya udah bulih A-, B+, enggau B ba mata pelajar ke diambi.

Nambahka nya seiku nembiaik kelas Sastera SMK St Joseph ti pemadu nyulut ba pemtus peresa STPM 2015 iya nya Mohd Edrizz Shah Hedzir ti bulih PNGK 3.50 (A, A-, B+, B).

Iya madahka diri temegah ati udah bulih pemutus peresa ti chukup ngemuaska ati iya.

“Aku gaga sereta puas ati enggau pemutus peresa aku. Aku enda nyangka diri teulihka PNGK 3.50 laban sebedau tu semina bulih 3.36.

“Udah tu aku nguji ngisi tauka nampung pelajar ba Intitut Pelajar Tinggi Perintah lalu deka ngambi Bidang Pelajar tauka politik. Aku agi ngiga IPTA ke patut, sereta deka nguji peluang ba tiga universiti iya nya Universiti Sains Malaysia, Universiti Malaysia Sarawak (UNIMAS) enggau Universiti Malaya (UM).

Kelimpah ari nya lebuah Utusan Borneo ngaga tinjau ngagai SMK St Thomas kemari, Penulung Kanan Tingkatan 6 madahka bisi 105 iku nembiaik sekula nya ke ngambi STPM nyengkaum ke nandu baru.

“Tang sehari tu kami semina nerima pemutus 45 iku chalun lalu ke bukai nya ti nandu sereta dipelaba pansut bulan April,” ku Penulung Kanan Form 6 nya madah ngagai Utusan Borneo, kemari.

Berebak enggau tu, seiku nembiaik SMK St Joseph ti nandu ngambi STPM sebedau tu, Lai Chang Hung, madahka diri gaga ati laban udah teulihka pemutus peresa ti lebih manah.

Iya ti deka nampung pelajar dalam bidang perubat ba universiti di menua tu madahka iya enda nyangka diri teulihka pemutus pas magang ba semua mata pelajar (4P).

“Aku ke nandu baru enda nyadang diri teulihka pemutus tu. Dikena ngulihka pemutus peresa ti lebih nyulut sekali tu aku lebih mekuh ngagai mata pelajar ti aku lembut baka Pengajian Am (PA), diatu aku teulihka A ba subjek nya,” ku iya seraya madahka diri bisi ngambi kelas tuisyen.

Nambahka nya, Sim Sin Tee ti teulihka 3A 1A- mega madahka diri gaga ati udah teulihka pemutus nya setrreta madahka diri mending lebuah pengajar ngajar dalam kelas kelimpah ngaga mayuh latih ba tetiap mata pelajar.

“Aku merambu deka nampung pelajar dalam bidang Undang-Undang, sereta aku milih antara Universiti Malaya (UM) enggau Univerisiti Kebangsaan Malaysia (UKM),” ku Sim lebuah dikerandau Utusan Borneo maya ti ngabas pemutus peresa STPM iya kemari.